

ՍԵՐՁԵՅ ՍԱՐԻՆՅԱՆ (Ծննդյան 100-ամյակի առթիվ)*

Լրացավ ականավոր գրականագետ-քննադատ, ակադեմիկոս Սերգեյ Ներսիսի Սարինյանի ծննդյան 100-ամյակը:



Սերգեյ Սարինյանն անցյալ դարի 50-ական թվականներին ասպարեզ եկած գրականագետ-քննադատների սերնդի ակնառու ներկայացուցիչներից էր, ում կյանքն ու գործն ամբողջապես նույնացավ այդ սերնդի պատմությանը: Սերնդային որոնումների ու հայտնության ընդհանուր համարժեքի մեջ նա փորձեց ներդնել երկու դարերի հայոց գրականության էջերի գեղագիտական-փիլիսոփայական իր մեկնությունները, որոնք հասցրեց ամփոփել գրականության պատմության և տեսության, գրական դպրոցների, գրականագիտության մեթոդաբանության, գրականության պարբերացման հարցերին,

առանձին դասական գրողների ստեղծագործությանը նվիրված իր գրականագիտական ժառանգության վեց հատորների մեջ (1988–2015 թթ.): Ժամանակի առանձնահատկություններից ելնելով՝ սերնդի գիտական որոնումները հետամուտ էին մինչ այդ հաստատուն թվացող արժեքների վերագնահատությանը, ինչը ենթադրում էր գիտական նյութի քննություն ոչ միայն պատմական, այլև արդիական հայեցակետերից, այլ խոսքով՝ գրականագիտության և քննադատության մեթոդաբանական ընդհանրություն, որի «հիմքը գիտականությունն է»:

Ծնվել է 1924 թ. հունվարի 17-ին ԼՂԻՄ-ի Ստեփանակերտի (ԼՂՀ Ասկերանի) շրջանի Սեյտիչեն (Խաչեն) գյուղում: Միջնակարգ կրթությունն ավարտելուց հետո՝ 1941–1942-ին, 1944 թթ. ուսուցչություն է արել տեղի միջնակարգ դպրոցում: 1942–1943 թթ. մասնակցել է Փաշխտական Գերմանիայի դեմ մղված թեժ մարտերին: Վիրավորվել է, պարզեցատրվել Հայրենական մեծ պատերազմի II աստիճանի շքանշանով: 1949 թ. ավարտել է Երևանի պետական համալսարանի բանասիրական ֆակուլտետի հայոց լեզվի և գրականության բաժինը: ՀՍՍՀ ԳԱ Մ. Աբեղյանի անվան գրականության ինստիտուտի ասպիրանտուրան ավարտելուց հետո՝ 1952 թվականից, աշխատանքի է անցել նույն

* Ներկայացվել է 11. X. 2024 թ., ընդունվել է տպագրության 21. XI. 2024 թ.:

¹ Ս. Սարինյան. Հայոց գրականության երկու դարը, գիրք առաջին, Երևան, 1988, էջ 3:

ինստիտուտում: Այնուհետև նրա ամբողջ երկարամյա՝ ավելի քան վեց տասնամյակ ընդգրկող գրական-գիտական կենսագրությունն անցել է Գրականության ինստիտուտի պատերի ներքո (1952–1958 թթ.՝ գիտաշխատող, 1958–1960 թթ.՝ ավագ գիտաշխատող, 1960 թ.՝ Հայ նոր գրականության բաժնի վարիչ): 2000–2004 թթ. եղել է գրականության մասնագիտության գծով գիտական աստիճաններ շնորհող գիտական խորհրդի նախագահ: 1953 թ. պաշտպանել է գիտական թեզ՝ «Քննադատական ռեալիզմի սկզբնավորումը Հայ գրականության մեջ» թեմայով և ստացել բանասիրական գիտությունների թեկնածուի, իսկ 1967 թ.՝ «Հայկական ռոմանտիզմ» հիմնարար մենագրության համար՝ բանասիրական գիտությունների դոկտորի գիտական աստիճան: Գիտական նշանակալից գործունեության համար 1970 թ. նրան շնորհվել է պրոֆեսորի, 1990 թ.՝ ՀՀ ԳԱԱ թղթակից անդամի, 1996 թ.՝ ակադեմիկոսի կոչում:

Ս. Սարինյանի գիտական մեծ վաստակն արժանացել է պետական և գրական-մշակութային մի շարք բարձր կոչումների ու պարգևների: Նա ՀԽՍՀ պետական մրցանակի (1980), ՀՀ նախագահի մրցանակի (2005) դափնեկիր էր, «Հայրենիքին մատուցած ծառայությունների համար» (2009) և «Մոխես խորենացի» մեդալակիր (2009), ՀՀ «Մերոպ Մաշտոց» շքանշանակիր (2004), ՀՀ ԳԳ նախարարության ոսկե մեդալակիր (2004), ՀԽՍՀ գիտության վաստակավոր գործիչ (1985): Պարգևատրվել է նաև Մ. Նալբանդյանի անվան (1986), Ն. Աղբալյանի անվան (2003), ԼՂՀ կառավարության ու ԼՂՀ ԳՄ Եղիշեի անվան (1999), ԼՂՀ «Վաչագան Բարեպաշտ» գրական մրցանակներով:

Ինստիտուտում ծավալած գիտական բեղուն աշխատանքի հետ զբաղվել է մանկավարժական ակտիվ գործունեությամբ՝ հանրապետության նոր սերնդի գիտական կադրերի պատրաստմամբ՝ Երևանի «Հրաչյա Աճառյան» համալսարանում աշխատելով որպես գրականության ամբիոնի վարիչ և դասախոս:

Գրականագետի հետաքրքրությունների շրջանակը հենց սկզբից պայմանավորված է եղել իր անհատականության՝ խառնվածքի ու մտածողության առանձնահատկություններով: Դա ամենից առաջ իր ներքին մտավոր-զգացական հնարավորությունների գորեղության գիտակցման վրա հիմնված մեծ ինքնավստահությունն էր: «Ես անհանգիստ ոգի եմ, – խոստովանել է նա, – մի անհասկանալի խզում կա իմ ներքին աշխարհի և արտաքին աշխարհի միջև»: Արտաքին աշխարհի անկատարությունն ու նյութապաշտությունը նրա բնավորությանը հաղորդել են «ներքին խռովք, (...) բնական հոռետեսություն», մեկ այլ կողմով դուռ են բացել նաև գրական կյանքի պրակտիկ հարաբերություններում երբեմն-երբեմն առաջ եկող թյուրմեթոնումների, փոխադարձ անհասկացողության դրսևորումների համար: Բայց հենց դրանք էլ կռել են նրա կամքը, օժտել «մաքառման ներքին մղումով»՝ հայացքն ուղղելով «դեպի վերերը»: Ահա, թե ինչու նրա միտքը մշտապես նպատակամիտված էր դեպի նորը, չպեղվածը: Ըստ էության, անհատական խառնվածքի այս հատկանիշներն էին ձևավորել մտքի-մտածողության այն քիչ հանդիպող որակը, որը ձգտում էր համակարգվածության, իսկ դա գիտականության նախապայմանն է:

Ս. Սարինյանի մտածողության մյուս կարևոր սկզբունքը՝ ռացիոնալիզմն էր, ինչը՝ նրա բնորոշմամբ, ապահովում է հետազոտական մտքի «ազատագրումը էմպիրիզմից և սոցիոլոգիական սխեմատիզմից, նրա տեսադաշտի և աշխարհայացքի ընդլայնումը պատմության, փիլիսոփայության և բնական գիտությունների հետազոտական փորձով»: Մեթոդաբանական նշված դրույթները, իր իսկ խոստովանությամբ, «ուրույն ուղղություն նշանավորեցին հայ

գրականագիտության պատմության մեջ՝ ակադեմիական դպրոցը»², որի հետ և նա կապում էր Հայոց գրականագիտական մտքի զարգացման հեռանկարը³:

Մեթոդաբանական նշված սկզբունքներով ավելի քան վեց տասնամյակի ընթացքում նա հեղինակել է տեսական, պատմաքննական բնույթի հիմնարար ուսումնասիրություններ, որոնք ամփոփվել են «Հայոց գրականության երկու դարը» (վեց հատորով, 1988–2015), «Հայ գաղափարաբանություն (պատմաքննական տեսություն)» (1998, 2005), «Հայկական ուսմանտիզմ» (1966), «Քննադատությունը և գեղարվեստական զարգացումը» (1973), «Գեղարվեստական գրականության պատմականությունը» (1979), «Հայ ռեալիզմի պատմական ուղին: Հայ ռեալիզմի պատմության և տեսության հարցեր» (1986) և այլ աշխատություններում: Նրա ընդհանուր գիտական ղեկավարությամբ, խմբագրությամբ և մասնակցությամբ են իրականացվել «Հայ նոր գրականության պատմության» հինգ հատորները (1962–1979), «Հայոց գրականության պատմության» երրորդ (2015) և դեռևս չհրապարակված չորրորդ հատորները, «Հայ քննադատության պատմության» երկու հատորները (1985, 1998), «Հայ վեպի պատմություն» հատորը (2005): Տարբեր տարիների լույս տեսած նրա մենագրությունները Հայ գրականության դասականների՝ Բաֆֆու (1959, 1985, 2010), Մուրացանի (1976, 2004), Լ. Շանթի (1991), Պ. Սևակի (2006) մասին, աչքի են ընկնում այդ հեղինակների անհատականության և ստեղծագործության տիպաբանական խորքային բացահայտումներով: Ս. Սարինյանի գրչին են պատկանում մի շարք ինքնատիպ գրողների (Ս. Տյուսաբ, Պ. Պոռչյան, Նար-Դոս, Պ. Սևակ) երկերի ժողովածուների, Վ. Տերյանի՝ Լենինգրադում հրատարակված «Стихотворения» (1980) ժողովածուի առաջաբանները, Մոսկվայում լույս տեսած «Армянская литература» դասընթացի «Հայ նոր գրականություն» բաժինը: Անվանի գրականագետն իր ներդրումն է ունեցել նաև «Հայ ժողովրդի պատմություն» բազմահատորյակի ստեղծման գործում՝ հեղինակելով երրորդ և հինգերորդ հատորների՝ գրականությանը վերաբերող բաժինները: Մի քանի տասնամյակի ընթացքում ուշի ուշով հետևելով գրական ընթացքի զարգացումներին՝ ունեցել է նաև բազմակի քննադատական ելույթներ, մասնակցել գրական բուռն բանավեճերի, գրել գրախոսականներ, մասնակցել Հայոց գրականության դասագրքերի կազմմանը:

Այսօր արդեն հանրագումարի բերելով վաստակաշատ գրականագետի գիտական հետաքրքրությունների շրջանակը՝ կարող ենք ասել, որ Ս. Սարինյանի նպատակը գրականության փիլիսոփայության ըմբռնումն ու բացահայտումն էր, որը մի նոր, ավելի խոր մակարդակի վրա է դնում գրականության երևույթների քննությունը՝ իբրև գիտական հետազոտության առարկա: Նա համոզված էր, որ «Գտնել գրողի մտադրույթը գեղարվեստական երկում, միասնական ելակետի ենթարկել երկի բազմանշանակ պատկերների միացնող օղակները, դիտել այդ ամենը բովանդակության ու ձևի միասնության մեջ՝ այս է գրականագիտության կոմպլեքսային հետազոտության ուղին և դա է, որ գրականագիտությունը բարձրացնում է փիլիսոփայական համադրությունը»: Շատ տրամաբանական էր Սարինյանի հարցադրումը՝ եթե կա պատ-

² Այստեղ և հետագա շարադրանքում հեղինակից մեջբերումներում ընդգծումները մերն են:

³ Ս. Սարինյան, Հայոց գրականության երկու դարը, գիրք չորրորդ, Երևան, 2004, էջ 543–544:

⁴ Ս. Սարինյան. Գեղարվեստական գրականության պատմականությունը, Երևան, 1979, էջ 20–21:

մոլթյան փիլիսոփայություն, արվեստի, կրոնի, իրավունքի փիլիսոփայություն, ինչո՞ւ է չի կարող լինել գրականության փիլիսոփայություն, որի իրավունքների հաստատմանը նա նվիրել էր վերջին տարիների իր հետազոտական ջանքերը:

Անվաճից այլևս պարզ պետք է լինի, որ նման մտածողության տեր հետազոտողը ոչ միայն արժեւորելու էր գաղափարի (ըստ նրա, ավելի լայն առումով գաղափարաբանության) առկայությունը գրականության և արվեստի, ազգային ու հասարակական մտքի տիրույթներում, ստեղծագործական մեթոդի անհրաժեշտությունը, առանց որի «չի կարող գիտություն լինել», այլև մշտապես գտնվելու էր «մտավորականության ազատամտական թևի գիրքներում»⁵:

Անվանի գիտնականն իր երկարատև ու բեղմնավոր կյանքի ու գործունեության ընթացքում մշտապես պաշտպանել է աշխարհասփյուռ հայությունը համախմբող ազգային գաղափարախոսություն, «Մի ազգ – մի եկեղեցի – մի մշակույթ» դրույթի կարևորությունը՝ համոզված լինելով, որ «Հայրենիք – Սփյուռք հարաբերությունը մեր ազգային կացության էական խնդիրներից մեկն է: (...) Մեր ազգային գոյության ձգտումը միակենտրոնությունն է, հայության հավաքականությունը, Հայ դատը, հայրենիքի միավորումը և անկախ պետականությունը: Միակենտրոնության առանցքը Հայաստանն է, որի հանդեպ Սփյուռքը ենթակայական է՝ թե մշակութաբանական և թե ազգային-քաղաքական անհրաժեշտությամբ»⁶:

Գրական-գիտական որոշ շրջանակներում Ս. Սարինյանի մտածողությունն ու ոճը երբեմն բարդ է համարվել: Սակայն, կարծում ենք, շատ ավելի ճշգրիտ էր Պ. Սևակը, երբ «ի ծնե ակադեմիկոս-գրականագետի» (Հր. Մաթևոսյան) մտածողության եղանակը որակում էր՝ «ըստ հարկի բարդ, բայց ոչ երբեք խրթին», ընդգծելով նաև նրա հայացքի թափանցողությունն ու խորքը «Ռմանք (ըստ ծանոթ առածի) ծառերի ետևում չեն տեսնում անտառը, իսկ Սարինյանը գերազանց անտառատես է»⁷:

Ակնհայտ է, որ անհատականության նշված որակները ձեռք էին բերվել գրականագետի տասնամյակների հարուստ փորձով, հայ և համաշխարհային գրական-գիտական, իմաստասիրական մտքի լավագույն ավանդույթների խորքային յուրացմամբ, ինչը և նրա վաստակը բարձրացնում է դասականության աստիճանի:

ՊԵՏՐՈՍ ԴԵՄԻՐՉՅԱՆ

Պետրոս Դեմիրճյան – բ. գ. դ., ՀՀ ԳԱԱ Մ. Աբեղյանի անվան գրականության ինստիտուտի Հայ նոր գրականության բաժնի առաջատար գիտաշխատող: Գիտական հետաքրքրությունները՝ դասական և ժամանակակից գրականություն: Հեղինակ է 3 մենագրության, գրականագիտական և գրաքննադատական բազմաթիվ հոդվածների: ORCID:0009-0003-6265-4421. pdemirchyan@mail.ru

⁵ Ս. Սարինյան. Հայոց գրականության երկու դարը, գիրք չորրորդ, էջ 543:

⁶ Ս. Սարինյան. Հայ գաղափարաբանություն (պատմաքննական տեսություն), Երևան, 1998, էջ 292–293:

⁷ Ս. Սարինյան. Հայոց գրականության երկու դարը, գիրք երկրորդ, էջ 58: